

COMMUNICAZIUN A LAS MEDIAS

Poschiavo, ils 10 da settember 2025

Resultat semestril 2025

Repower cun in bun resultat semestril ed in ferm engaschi per la forza idraulica grischuna

Cun in resultat operativ (EBIT) da 65 milliuns CHF ed in gudogn da la grupp da 47 milliuns CHF ha Repower realisà l'emprim semester 2025 in resultat legraivel che surpasa la media. La gronda part a quest success ha contribuì il commerzi internaziunal cun energia. A medem temp rinforza Repower ses engaschi per la forza idraulica grischuna e per il svilup da las energias regenerablas, quai che signifitga in augment considerabel da las investiziuns en ils implants da produziun e las raits. Sin fundament da las stgarsas precipitaziuns è la produziun d'electricitad da las atgnas ovras idraulicas stada pli bassa che la media da blers onns.

Repower guarda enavos sin in emprim mez onn 2025 legraivel cun in resultat che surpasa las spetgas. Il resultat operativ avant la deducziun da tschains e da taglias sin la rendita (EBIT) munta a 65 milliuns CHF, il gudogn da la grupp a 47 milliuns CHF. Ils resultats extraordinaris dals dus onns precedents, ch'èn stads marcads dals pretschs da record als martgads d'energia, n'ha l'interpresa sco spetgà betg pudì cuntanscher. Repower dispona d'ina ferma quota d'agen chapital da 59 pertschient e d'in aut nivel da meds liquids. L'interpresa stat uschia sin in fundament finanziel fitg solid ed è posiziunada optimalmain per far las investiziuns strategicas necessarias per mantegnair ed amplifitgar ils implants da produziun e las raits da distribuziun.

Autas investiziuns en las energias regenerablas

Repower promova vinavant cun gronda persvasiun il svilup da las energias regenerablas en il Grischun. Durant l'emprim mez onn ha l'interpresa investì 11 milliuns CHF en implants da produziun, ulteriurs 17 milliuns CHF en la rait da distribuziun. Las renovaziuns da las ovras idraulicas Papierfabrik Landquart, Campocologno e Claustra èn vegnidas terminadas cun success. En l'implant electric a Silvaplauna han cumenzà las lavurs da renovaziun. A Madrisa sper Claustra è vegnida fatga l'emprima badigliada per in implant solar alpin – in project da pionier cun effect da signal per l'electricitad d'enviern urgentamain necessaria. Cun survegnir la concessiun per l'ovra idraulica Chlus ha Repower ultra da quai cuntanschì in term central. Quai è in grond pass per realisar in project impurtant cun la finamira da rinforzar la forza idraulica grischuna.

Repower sustegna il svilup da la fotovoltaica en il Grischun cun integrar a moda effizienta indrizs solars privats. Durant l'emprim mez onn ha l'interpresa cuntanschì la marca da 3000 implants colliads cun la rait da distribuziun. En total han ils indrizs solars privats uschia ina capacitad da passa 65 megawatt – dapli che la pli gronda ovra idraulica da Repower. Grazia al dumber

creschent d'indrizs fotovoltaics privats, da vehichels electrici e da pumpas da stgaurar s'augmenta era fermamain il basegn d'investiziun en las raits da distribuziun. Quest svilup vegn anc a s'intensivar ils onns vegnents.

L'enviern cun pauca naiv ha consequenzas per la producziun d'electricitad

La producziun da forza electrica en las atgnas ovas idraulicas è stada pli bassa durant l'emprim semester 2025 che la media durant blers onns. Il motiv per questa reducziun è las stgarsas precipitaziuns. Durant ils mais d'enviern hai navi pauc, consequentamain è era luada pauca naiv. Era la primavaira e la stad tempriva è las precipitaziuns stadas en tschertas regiuns pli flaivlas ch'en la media da blers onns.

En l'Italia è la quantitat d'electricitad producida d'implants solars e d'implants da vent restada praticamain invariabla cumpareglià cun l'onn precedent. La situaziun da partenza per l'ovra electrica cumbinata cun gas a Teverola sa preschenta medemamain tuttina. La dumonda d'energia da regulaziun da l'ovra electrica per stabilisar la rait d'electricitad taliana resta vinavant fitg bassa.

La fatschenta commerciala contribuescha la pli gronda part al resultat

La pli gronda part al resultat ha danovamain contribuì la fatschenta commerciala internaziunala. Era sche l'import è stà sco spetgà pli bass che l'onn precedent, surpasa el tuttina cleramain la media da blers onns – malgrà las cundiziuns dal martgà pretensiusas e las stgarsas affluenzas hidrologicas. Ils pretschs da l'electricitad als martgads a termin è restads pli u main stabils, malgrà che l'ambient dal martgà è stà marcà da tensiuns geopoliticas. A medem temp è dentant s'augmentada la volatilitad a curta vista, che vegn influenzada da las novitads actualas e da la part creschenta dal commerzi automatisà.

Svilup positiv en l'Italia

La fatschenta commerciala en l'Italia, nua che Repower furnescha electricitad e gas surtut ad interpresas pitschnas e mesaunas, è sa sviluppada a moda positiva. La contribuziun da l'Italia al resultat semestral ha perquai pudì vegnir augmentada levamain cumpareglià cun l'onn precedent. Tut en tut ha Repower investì en l'Italia 21 milliuns CHF en implants renovabels, stgars 12 milliuns CHF da quels en la construcziun d'in implant solar da 20 megawatt a Ghislarengo (Piemunt) e var 7 milliuns CHF en in project d'agrivoltaica a Ciminna (Sicilia).

In sguard en l'avegnir

Il resultat finanziar da Repower è tenor experientscha pli ferm durant l'emprima mesadad da l'onn che durant la segunda. Las segiradas temprivas da la producziun d'electricitad durant las turbulenzas dal martgà l'onn 2023 han era già durant l'emprim semester 2025 in effect positiv. Per il segund mez onn quinta Repower medemamain cun in bun resultat.

Cifras distintivas da la grupp Repower

Resultat semestril 2025

en miu. CHF	1. semester 2025	1. semester 2024	1. semester 2023	midada 2024/2025
EBIT	65	97	220	-33 %
gudogn da la grupp	47	78	181	-40 %
prestaziun generala	1'080	1'221	1'746	-12 %
summa da bilantscha	2'010	2'475	2'636	-19 %
agen chapital	1'177	1'170	1'031	+1 %
quota d'agen chapital (pertschient)	59	47	39	+26 %
investiziuns (en baints materials ed immaterials)	53	28	54	+89 %
fluss monetar a basa d'activitads operativas	62	175	206	-65 %
collavuraturas e collavuratur (dumber)	739	726	622	+2 %

Remartgas

- Infurmaziuns davart las finanzas ed il rapport semestril cumplet 2025 da Repower èn disponibels sin repower.com/investors.
- Il rapport semestril cumpara en lingua tudestga, taliana ed englaisa en furma electronica. En cas d'interpretaziuns divergentas è decisiv il text tudestg.
- En quest text vegnan exprimidas aspectativas e supposiziuns davart svilups futurs pussaivels. Questas constataziuns èn suttemessas a malsegirezzas e ristgas. Il svilup effectiv po perquai divergiar da las constataziuns formuladas qua.

Contact

Stefan Bisculm

manader post da medias

t +41 81 423 77 00

medien@repower.com

Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valorisaziun da l'electricitad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovas idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.